



# Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 7 Yangia anidakangma : Tir Yimym tir\_yimym

tir yimym TAPAK 8

**Iran-i nuclear nok-nü yanglutsü tebilemba mali: Tir Masoud**

**ATP rankings: Taylor Fritz maneni 4buba nung lir**

VOL. XXII ISSUE NO. 245 (ADOK 245) DIMAPUR YANGTEPNÜ (THURSDAY) AAMI (JUNE) 19, 2025 ₹ 5.00

## Chakhesang tsür dak atalokba aitsür: WNYF

**Dimapur, June 18, 2025 (TYO):** June 15, 2025 nü Dimapur nung Chakhesang tsür ka dak tim mesüi kongshiba aser teka sangshiba khukhua aitsür ta Western Naga Youth Front (WNYF)-i metetdaksüogo.

Tetsür la ya Pune nungi aru aser 4th Mile, Dimapur nungi auto-rickshaw ka nung mener aodang iba tesempatsü mapa inyak. Auto-rickshaw driver-i lenmang taoleni masü saka Niuland Road tsütsü anir ao aser idangji passenger-i tetsür la dak tim mesüi kongshi ta WNYF-i ashi.

Tetsür la la sasa kümzüksü atema tasü itta auto-rickshaw nungi pungzük aser idangji la yiru. Iba tesem nung alirtemi mapang shitak nung tapet mapa inyakba atema tenüngsang agütsür aser parnoki driver aser passenger naprong apu ta parnokisa ashi.

Iba tatalokba nung tai tonglokja alirtem ozüing tesashi agi merenshitsu la aser non-Naga nung adopt asüba mesüra Naga nung tenüng amshiba ya anendaktsütsüla ta WNYF-isa metetdaksüogo.

## Dharti Aaba Janbhagidari Abhiyan indang sentong agi

**Dimapur, June 18, 2025 (TYO):** June 18, 2025 nü Dharti Aaba Janbhagidari Abhiyan kübok State Level "Awareness & Benefit Saturation Camp" ka agiogo.

Iba sentong ya DC Office Complex, Kohima nung agi aser Tribal Affairs & Election Advisor H. Tovihoto Ayemi-i tetushi tejaoker ka ama shilem agi.

Iba camp ya June 15 nungi 30, 2025 tashi alitsü aser Nagaland o India nung lisopurtem ajangzüksü atema ayonga agir ta Tovihoto-i ashi.

Abhiyan ya sentong jangratemtsüka lir anungji district ketdangsur ajaki yimtsung 608 ajangzüksüsa mapa inyaktsüla ta pai ashi.

"Lisopurtem ama asenok ya most backward aser interior areas nung alir aser asenoki tangar menenep. Prime Minister Narendra Modi lenisüba kübok India sorkari Chief Minister Dr. Neiphiu Rio lenisüba kübok state sorkar den yaritepa Viksit Bharat

dak rangloker lisopur kintem renlokdaaktsütsü atema inyaker" ta Advisor Tovihoto-isa ashi.

Asen state renlokra India ajunga renloktsü. Iba mission ya iba mangdang yur tenzük aser line department ketdangsur ajaki Nagaland nung yimtsung ajaki iba tajangzük angutsüsa inyaktsü ayongzük ta paisa ashi.

Department of Tribal Affairs ya lisopurtem ajungkettsü atema tentetba lir. Dharti Aaba Janbhagidari Abhiyan kübok Deputy Commissioner temi anir line departments-i yimtsung aser block ajak nung mapa balala inyaktsü ta Tribal Affairs Joint Secretary T.L. Kiusumong-i ashi.

Dharti Aaba Janjatiya Gram Utkarsh Abhiyan (DA-JGUA) ya districts 17, blocks 74 aser yimtsung 608 nung inyaktsü. Iba mapa ya 2024-25 nungi 2028-29 tashi küm pungu inyaktsü aser line departments 17 yariteptsü ta State Nodal Officer for DA-JGUA, Imsumeren-i PowerPoint presentation ka ajanga lemsatop.

## Naga nungeri Kuki SoO camps atema ashishir

**Imphal, June 18, 2025 (Agencies):** Manipur nung Foothills Naga Coordination Committee (FNCC)-i India sorkar aser Kuki telungpur teloktem dang Naga nung lushi nung Suspension of Operations (SoO) camps lapoktsü merangba anentsü shiogo.

Ministry of Home Affairs (MHA) aser Kuki-Zo telungpur teloktem tsungda Meitei nung alidak lapoka aliba camps 14 nungi 7 shi ka Manipur foothills leni belentsü mulungtepba sülen FNCC-i iba osang metetdaksü.

June 16 nü SoO pact kübok aliba Kuki-Zo teloktem aser Centre sorkar nungi teshimtet nübotem tsungda iba agreement

ya agitepa liasü.

FNCC-isa Naga nung alidak anasa aliba SoO camps ajak agientsü takhangba agütsüogo.

Kuki National Organisation/ Army (KNO/A) aser Zomi Revolutionary Army (ZRA) kübok Kuki telungpur telok 25-i 2008 nung Centre den yimjung tenangzüktep nung sign sütepa liasü.

Iba nung telok 17 tashi KNO kübok aser telok 8 tashi United People's Front (UPF) kübok lir.

Kuki telungpurtemi Manipur sasep nung Kuki state ka akhanger aser iba atema yimten olemtep tenzükür.

Kuki telungpur 2,200 shi ka nem SoO pact kübok ita shia Rs 6,000 stipend agütsür.

## Northeast ajungalen Mobius Project inyaker



**Kohima, June 18, 2025 (TYO):** Bodbarnü northeastern state 8 prong nung Mobius Climate Project tenzükogo.

"Northeast ya biodiversity hotspot ka lir aser lipoküm tsütsü lendong aika lir" ta Nagaland Deputy Chief Minister T.R. Zeliang-i 'Mobius Young Climate Leaders for Himalayan Development' sentong tenzük dang ashi.

"Northeast nung environmental awareness kanga ajema lir" ta pai ashi.

Mobius initiative ajanga lipoküm dak sendakba tangatetba prokshitsü aser iba nung local temi shilem agitsü aser

communication tajungba akümtsüta TR Zeliang-isa ashi.

"Sorkar, shisashirtem, civil society aser Mobius Foundation amala mangdang aliba teloktem yaritepba ajanga iba alizung atonger" ta pai ashi.

Mobius Climate Project ya education, youth leadership, aser integration of indigenous ecological knowledge ajanga nature-based solutions bushiba telok ka lir.

2023-24 nung iba Project ya Nagaland nung takok ngua inyaktet aser tang Northeast ajungalen inyaker. Iba Project nung Young Climate Professionals 63 nem training

agütsütsü aser parnok ya state shia nungi nisung tugugu (9) lir ta TR Zeliang-i ashi.

Lanur lennirtemi community forest management, sustainable beekeeping, aser Pani-Pahar curriculum amala ajanga promote eco-literacy ajungkettsü.

Iba ya India-i National Climate Adaptation Plan den puteper. Northeast renlokba nung climate awareness aser education ya tamendakdak asütsüla. Mobius Project amala mapatem ajanga Northeast ya India nung sustainable aser inclusive climate action model ka akümtsü ta Zeliang-isa metetdaksü.

## Nagaland Fisheries-i Doyang nung ango techanu lakh 1 chiok



**Kohima, June 18, 2025 (TYO):** Bodbarnü Department of Fisheries & Aquatic Resources-i Doyang River nung fingerlings lakh 1 puokogo aser iba ya Wokha aser Zunheboto district tem artsülen lir.

Aghakupu, Doyang nung awareness programme-cum-fish ranching sentong mezüngbuba shilem nung ango chanutem puoka liasü.

Iba sentong nung Nagaland State Fish - Mahseer dena indigenous fish aik puokogo. Tsungki (Wokha) aser Philimi (Zunheboto) nungi lokti lennirtem aser Gaon Burahs (GBs) den Principal Secretary Y. Kikheto Sema aser Director Rongsennungba nati anir

ketdangsurtemi ango chanutem puok.

Iba mapa ya Pradhan Mantri Matysa Sampada Yojana kübok inyaker.

"Asenoki asen ayongtem aser lipoküm wazüka ayutsüla. Iba mapa inyaktsübaji tang lir. NBCC resolution nunga lipoküm kümzüka ayutsü aser tim mesüi angopuba aser shikariba ajak noktangsü lir" ta Principal Secretary Kikheto Sema-i ashi.

Nagaland-i kümshia tangalen nungi shi aser ango bener aruba nung Rs 2,200 crore endoker. Nagaland-i 14,000 metric tonnes shi nungdaker aser tangalen nungi 50 nungi 60 lakh kilograms bener arur ta pai ashi.

Phek district-i imported meat

products noktangba atema tenüngsang agütsü aser tanga district temia iba amaji inyaktsüla ta Kikheto-isa ashi.

Zunheboto kübok Philimi aser Wokha nung Tsungki nung alirtemi Doyang River nung chemicals, explosives, aser batteries mamshitsü ayongzük ta paisa ayongzük.

Ango ya chiyungtsü ka dang masü saka ornamental aser sport fishing atema tajung lir. Angling Associations den yaritepa catch-and-release sport fishing ajungket nung junger aser Green Zone Committees tenteta angopuba inyakyim latetsüla aser ayongtem kümzüka ayutsüla ta Director Rongsennungba-ia ashi.

## Mokokchung nung mozü ayokba tesemtem semdanga jaja



Mokokchung jila nung ketdangsür temi Drug and Cosmetic Act, 1940 nung ajemdaker June 16, 2025 nü mozü ayokba tesemtem sema aodang tangokba noksa ka yangi angur.

**Dimapur, Aami/June 16** (TYO): Kohima District Planning and Development Board (DPDB) senden June 16 nü DPDB Hall, Kohima nung menogo. Iba seden nung MLA aser DPDB mendenbuba Kevipodi Sophie-ia shilem agia liasü.

Deputy Commissioner

Kohima, B. Henok Buchem, NCS, shiba lenisüba nung iba senden agi, pai taoba senden nung sensaksembatem lephshia metetdakja liasü. Tawa World Day Against Child Labour anogomung amungba indang süoka jembiba mapang DC-i ketdangsürtem dang child labour

temzüng ozüing sülen tashi anga anidaktsü nenshia metetdaktsü. Paise, arishi küm 14 tekübok aliba tanurtem mapa kecha nunga manioktsü aser arishi küm 14 nungi 18 tsüingda alir tainlonglongtem lendong aketba mapatem nu atema jenjang agitsü ajungs

## Agniveer recruitment atema application meshir

**Dimapur, Aami/June 18** (TYO): Agnipath Scheme kübok 2025-26 asoshi category balala nung Agniveers ama shimtsü atema kibong makum aliba teburtem nungi online applicatons meshir.

Iba kasa atema online registration ya March 12 nungi April 25, 2025 tashi agiogo aser Manipur aser Nagaland state tem nungi temsüa aliba lanurtemi application agütsüogo.

Pei sasa register süa aliba candidates tem asoshi Online Computer-Based Written Examination or the Common Entrance Examination (CEE) ya state anaprong nung shimteta aliba centers nung June 30, 2025 nungi July 10,

2025 tashi agitsü aser iba indang osang tejangja metetdaktsüsü.

Candidates ajunga tatidang agitsü minute 90 lia Admit Card colour printout bener examination center tonga arutsüla. Tatidang tenzüksü minute 30 lia gate shibangtsü aser iba sülen candidate kata aittsü memelatsü.

Online CEE nung candidate tem practice asütsü atema 'Join Indian Army' website nung category telemsa shia link agüja lir.

Anungji candidate temi shidakba CEE magütsü dang khen bosa practice asütsü ajungshir.

M a n e n i

www.joinindianarmy.nic.in nung "How to Appear for online CEE" animated videos agüja lir.

Educational qualifications, physical/medical standards aser job specifications indang osangtem website nung agüja lir.

Online registration mapang category ana asoshi agüja aliba candidates temi question papers aser category shia merit drawn balala aliba yong CEEs anaprong nung agütsüsüla.

Iba dak sendakba nung tali metetpelaner temi Army Recruitment Office, Rangapahar den

03862-249012; 7628023484, email: swarkokila@nic.in ajanga tongteprateptsü akok.

## NIMSR nung World Blood Donors Day amung



**Dimapur, Aami/June 18** (TYO): Voluntary Blood Donors Association Nagaland ajanga Nagaland Institute of Medical Science & Research den lungiemer June 18, 2025 nü NIMSR Kohima nung World Blood Donors Day mungogo.

Sentong akhumdong ka ama Director, Tourism, Veyielo Doulo-i jembidang, takum kumzüksü asoshi azü tenla agütsüba ya kanga tongtipang lir aser medical treatments balala nung yarir, kechiaser azü ya artificial yimya nung meyangluteter aser surgery agir, shiranger mesüra yiruba nungi taneptsü angur asoshi azü ya

kanga tongtipang lir ta ashi. Mapang shia azü tenla agütsüba ajanga blood supply tajungba kumdaktsür aser temang nung azü inoktsü tanen makai nungdakba peritsür, ta ashi.

Voluntary Blood Donors temi nisung takum kumzükba atema pai pelaba lemsatop aser Voluntary Blood Donation ya angati teyari agütsüba maparen ka lir ta ashi.

Blood Donation atema awareness tali nungdaker aser azü bushir teti lir aser azü tenla agütsüba ajanga shiranga alir azü nungdakba peritsür ta angatetdaktsüsüla, ta Doulo-i

ashi.

Iba sentong nung Imtisenla Longkumer menden liasü, Director cum Dean NIMSR, Prof. Dr. Soumya Chakraborty ajanga pela agizükba o jembia aser Director NSBTC Dr. Avile Zao-i iba anogomung indang rateta ashi.

Maneni Medical Officer Blood center NHAK Dr, Avila Sangtam-i Voluntary Blood donation indang onük nung jembia aser Secretary VBDAN Ketichu Kent ajanga melepzüing o jembiba sülen blood donation camp akaba nung nisung 51-i azü angati tenla agüja liasü.

## Chathe ayong nungi long aser lise agizükba nokdang

**Dimapur, Aami/June 18**

(TYO): Niuland district kübok Chathe ayong nungi tapi agi long aser lise agizükba ajanga libajen tanaben yanglutsü mokoki raksatsür aser temeket nung aliba nisung takum aser ki o jen lendongi yoker, ta Deputy Commissioner Niuland, Sara S Jamir ajanga sangdong ka nung

metetdaktsü.

Anungji shia aliba tesem nungi longsang aser lise agizüktsü khentyongi memelar, ta ashi.

Aibelener kar danga lira, ozüing agi melaba ama merenshitsu aser machinery aser oset-tsüset pua ayutsü, ta sangdong ajangasa ashi.

## School Education ajanga metetdaktsür

**Dimapur, Aami/June 18**

(TYO): National Human Rights Commission ajanga taoba küm 'Advisory for the Protection and Rehabilitation of Impoverished, Uneducated Children, Women and Differently-abled Individuals engaged in Begging' metetdaktsüba ama Department of School Education, Nagaland ajanga NGOs, Municipal/Town/Village Councils, Arago, kaketshir tentet aser nüburtem dang Child Help Line 1098 nung tsüinglanglen shia aliba category nung tanurtem anasatiba Government Schools nung tenüing zülüoktsü asoshi osang tejangja agütsüsü ayongzükogo.

1. Out of School Children

(Tanur shirnoksa school kata nunga tenüing mezülüok mesüra Elementary Education merenemi züingbeter anenba) meshimetsür densema age group 6-14 nung alirtem.

2. Arishi küm 3-6 tsüingta tanurtem, shir tsürabortem meshimetsür aser Pre-School/Anganwadi/Balvatika nung tenüing zülüoka mali.

DEOs/Sr. SDEOs/SDEOs ajunga dang pei District Child Protection Units aser Child Welfare Committees den angatettepa admission agidaktsüsüla aser RTE Act, 2009 nung shia aliba ama anasatiba Government Schools nung tenüing zülüokdaktsüsüla, ta DoSE sangdong ajanga ashi.

## Mon DPDB senden menogo

**Dimapur, Aami/June 18**

(TYO): Mon District Planning & Development Board senden June 2025 atema Deputy Commissioner, Mon indang Conference Hall, Mon nung June 18, 2025 nü menogo.

Iba senden ya Deputy Commissioner and Vice Chairman DPDB Mon, Wennyei Konyak, NCS lenisüba kübok amen aser DPDB Chairman MLA, Mankhao Konyak; Advisor, Treasuries & Accounts and Art & Culture, Konngam Konyak aser MLA & SDPB Chairman Tobu, Neiba Konyak nung iba senden nung adenba atema pelaba lemsatopa liasü.

Senden nung Good Samaritan School Phomching upgrade asütsü atema jembia aser temaba ketdangsür dangi yoka liasü.

Iconic Project densema LADP 2025-26 agizük, Mopong nung police out post yanglutsü, Forest Colony nungi Police Reserve tashi

lenmang yanglutsü indang jembia agizüktsü asoshi temaba jenjangi yoka liasü.

Senden nung GPS Shamnyu Ward, Mon Town nung site permit indanga jembia aser iba atema district administration dang iba tesem semdanga ali tenla agütsür den sensaksemtsü nunglokttsü.

CMO office ajanga District Integrated Strategy for HIV/AIDS, DISHA indang PowerPoint agütsü aser SDO (C) Mon, Ajit Kumar, IAS ajanga Mon Smart Hub indang tongmelang agi rasaa ashi. Pai departments ajunga dang ajak ajangzüktsü mechi Smart Hub Portal nung shilem agitsü ayongzükba liasü.

Konyak Students' Union tir Temwang Konyak ajanga district nung fire stations, police stations aser electricity peria maliba indang lemsatopa liasü.

Kasa senden nung Mon district nungi HSLC aser HSSLC tatidang nung takok tajung angur nem tetushi agüja liasü.

## Deputy Speaker NLA ajanga Committee senden ayonger

**Dimapur, Aami/June 18**

(TYO): Nagaland Legislative Assembly indang Deputy Speaker aser Nagaland Legislative Assembly Library Committee indang Chairman, S. Toiho Yeptho-i 2025-2026 kümsük atema mezüingbuba Committee senden ya June 25,

2025 anüingdang 11:00 ako nungi tenzüka Chongshen Committee Room, Assembly Secretariat, Kohima nung amentsü metetdaktsüogo.

Iba senden nung Committee züingsem ajak medema arua adentsü ayongzükba, ta sangdong ajanga ashi.



June 18, 2025 nü Alberta, Canada nung Ato kilonser Narendra Modi (tesülen ajichilen nungi tasembuba) den G7 lenirtem aser International organizations balala nungi tejaokertem G7 Summit alidang tangokba noksa nung angur.

### Kiralongra pusemba linüktem anema inyaksüla: PM Modi

**New Delhi/Kananaskis, Aami/June 18 (Agencies):** Canada kübok Kananaskis yimti nung G7 senden tanünübuba sentong nung Ato kilonser, Narendra Modi-i linük balala nungi lenirtem aser organization balala nungi lenirtem den kiralongra, shishilembaba aser terenlok densema alima nung tongtibang onük aika nung o lemtepo.

Bodhbarnü G7 Outreach senden nung jembidang Ato kilonser Narendra Modi-i, India-i kiralongra anema raratsü melungteter inyaker, ta ashiba den külemi alima linüktemi kiralongra anema longjemer raratsü ayongzük.

Ato kilonser Modi-i G7 züngsem linüktem nungi lenirtem dang kiralongra anema nokdaksü aser kiralongra pusemertem anema inyaksü ayongzük.

"Kiralongra pusemertem anema inyaksüla. Alima nung

yimjung aser azükaru atema asen tangatetba aser inyakyimji tejangja asütsüla. Linük kari danga kiralongra pusemra iba atemaji parnok nem taa agütsütsüla," ta pai ashi.

Paisa, "Külen, kiralongraba anema linüktem apir tenokdangba agütsür saka külenbo odiodia kiralongra pusemertem nem sempet agütsür," ta ashi.

Tesülen Ministry of External Affairs otongdar, Randhir Jaiswal-i X ajanga, "Ato kilonseri kiralongra anema India tangatetba lephsia metetdaksüogo. Iba denji külemi kiralongrartemi Pahalgam amakba tatalokba aitsüba atema pai lenirtem dang pelaba lemsatop. Paisa kiralongra anema linüktemi longjemer raratsü aser kiralongra ajungkettsür aser kiralongra pusemertem nem temerenshi agütsütsü ayongzükogo," ta metetdaksü.

Ato kilonser Modi-ia X ajanga, G7 lenirtem den senden nung alima nung tayongzükba onük balala atema jembiogo aser alima tajungba akümtsü imlar, ta metetdaksü.

Ato kilonser Modi-isa Canada Ato kilonser Mark Carney, UK Ato kilonser Keir Starmer, France Tir Emmanuel Macron, South Korea Tir Lee Jae-myung, Italy Ato kilonser Giorgia Meloni aser Australian Ato kilonser Anthony Albanese nunger den-a jurila senden amen. Modi-i linük ana tsüngda tesendaktep tajungba akümtsü atema jembiba den külemi rongsenkettzüng tsütsü taliba amalitepa inyaksü atema jembiogo.

India aser Canada nati consular aser shishilembaba services tajungba akümtsü atema tekeraba nung high commissioners tasen shimtsü bangjemogo.

### Air India tayimtsü tsükokba lendong nung asür 190 maitsü jangjaogo

**New Delhi, June 18 (Agencies):** Taoba hopta Ahmedabad nung Air India tayimtsü tsükokba lendong nung tayimtsü nung mena alirtem aser medical college campus nung alirtem aika süogo; tasü mang 190 bo DNA test agiba ajanga maitsü jangjago.

Tang tashi nung maitsü jangjaba tasü mang 190 nungjagi bendanger tasü mang 32 densema tasü mang 159 kinüngertem ket nung agütsüogo.

June 12 nü London-i apusoba Air India tayimtsüji airport nungi ayamesoba sülen minute ka majungdang tsükoka liasü. Iba tayimtsü nungji nisung 242 liasü saka nisung ka dang kümzük.

Osangbenertem den jembidang Ahmedabad Civil Hospital nung medical superintendent Dr Rakesh Joshi-i, "Bodhbarnep tashi nung DNA samples 190 jangjaogo

asertasü mang 159 bo kinüngertem nem agütsüogo. Tang tashi DNA samples tendangdar," ta metetdaksü.

Tasü mang 272 nungi tasü mang 159 jangja kinüngertem ket nung agütsü. Tasü mang 159 ji India nunger 127 tasü mang, Portugal nunger pezü, British nunger 27 aser Canada nunger ka tasü mang lir.

India nunger tasü mang 127 nungjagi 123 tayimtsü nung asürtem aser pezübo medical college campus nung asürtem lir, ta Joshi-i metetdaksü.

"Tayimtsü tsükokba sülen iba lendong nung yirur nisung 71 hospital-i anir oa yari. Tang Civil hospital nung parnok tenet dang mongdar aser tangar 12 Ahmedabad aser Dahod nung aliba nija hospital tem nung treatment agidar. Yangi (civil hospital) treatment tagidak mapang nung nisung asembo süadokogo," ta Joshi-isa metetdaksü.



Diu, June 18, 2025: Tawa Ahmedabad nung Air India tayimtsü tsükokba lendong nungi kümzüksang, Vishwas Kumar Ramesh teno Ajay tasü mang rongdokba sentong nung adenba noksa nung angur. Kasa tayimtsü lendong nung teno Ajay bo mekümzük.

### Takümba Amarnath Yatra atema helicopter service malitsü: SASB

**New Delhi/Srinagar, June 18 (Agencies):** Bodhbarnü Shri Amarnathji Shrine Board (SASB)-i, takümba Amarnath temeshi ainlen jartem atema helicopter services malitsü, ta metetdaksüogo.

Jammu & Kashmir sorkari July 1 nungi August 10 tashi Amarnath yatra lenmangtemji 'no fly zone' asütsü, ta sangdongba sülen SASB-ia helicopter service anenba sangdonger.

SSAB-i sangdong ka ajanga, "June 16 anogo nung tim ketdangsertemi Pahalgam aser Baltal lenmangtem densema Shri Amarnathji Yatra lenmang ajakji July 1 nungi August 10 tashi 'no flying zone' asütsü, ta tetuyuba agütsüogo. Iba dak sendakba nung Shri Amarnathji Yatra (SANJY) 2025 nung temeshi ainlen jartem atema helicopter services malitsü," ta metetdaksü.

Iba dak alia Jammu & Kashmir Lt. Governor Manoj Sinha-ia South Kashmir kübok Pahalgam aser North Kashmir kübok Baltal lenmang ajanga Amarnath Cave-i aertem ajak

tetsüng agi dang jajatsü mesüra kor nung sanger senzütsü tuyuogo, ta SASB-i metetdaksü.

Küm shia agiba Amarnath Yatra ya July 3 nungi tenzüksü. Mongolbarnü Union Home Secretary, Govind Mohan leniba nung tongti ketdangsertem senden mena Amarnath Yatra mapang temeshi ainlen jartem nem security junga agütsütsü atema jembiogo.

Iba senden nungji Director Intelligence Bureau (IB), J&K Chief Secretary Atal Dulloo, DGP Nalin Prabhat, GoC 15 corps Prashant Srivastava, central/UT agencies nungi Intelligence Officers aser CAPFs nungi tongti ketdangsertem dena liasü.

Iba sendenji tembangba sülen sorkari temeshi ainlen jajaba lenmang ajakji "No flying zones" asütsü, ta sangdonga liasü.

Amarnath Yatra metembang tashi temeshi ainlen jartem anenzükdaksütsü, health service agütsütsü densema nüngdak ajakji sorkar ketdangsertem aser SSAB-i achaayangtsütsü.

**GOVERNMENT OF NAGALAND**  
**DIRECTORATE OF TECHNICAL EDUCATION**  
NAGALAND: KOHIMA

NO.DTE/CSAB.NEUT/1/2025 Dated Kohima, the 18 th June 2025.

**NOTIFICATION FOR CSAB-NEUT : 2025**

This is to inform all the JEE (Main)- 2025 appeared candidates that registration for counseling under CSAB-NEUT" 2025, to fill up Nagaland State Quota in Engineering, Architecture and Pharmacy, can accessed from the portal www.csab.nic.in . Interested candidates are advised to strictly adhere to the Schedule/ timeline given below chart.

**Seat Allocation Schedule for CSAB NEUT - 2025**

Sl. No.	Event	Duration
1.	Online provisional Registration and uploading of documents [Engineering, Architecture & Pharmacy]	Jun 23 (MON) 10:00 h – Jun 30 (MON) 17:00 h, 2025
2.	Filling up of choices	Jun 24 (TUE) 10:00 h – July 9 (WED) 17:00 h, 2025
3.	First Round of Seat Allotment	July 15 (TUE) 17:00 h, 2025
4.	Online reporting (Round 1): Online payment of seat acceptance fee (SAF) of Rs. 5,000/- Exercising willingness options (Float/Slide/Freeze) by the candidates who have been allotted seats against first Round of allotment. Candidates exercising the Freeze option can download Provisional Admission Letter (PAL) and proceed for final admission at allotted Institute as per schedule.	July 16 (WED) 10:00 h – July 21 (MON) 17:00 h, 2025
5.	Second Round of Seat Allotment	July 28 (MON) 17:00 h, 2025
6.	Online reporting (Round 2): Online payment of seat acceptance fee (SAF) of Rs. 5,000/- only for the candidates who have been allotted seats for the first time Candidates can download Provisional Admission Letter (PAL) and proceed for final admission at allotted Institute as per schedule.	July 29 (TUE) 10:00 h – Aug 01 (FRI) 17:00 h, 2025
7.	Seat Withdrawal	Aug 02 (SAT) 10:00 h – Aug 04 (MON), 17:00 h, 2025
8.**	Reporting at the allotted Institute for admission	July 23 (WED) – Aug 06 (WED), 2025

**Note: -**  
\* Registration and Choice filling for Engineering & Architecture will be separate from that of Pharmacy.  
# Candidates will be permitted to fill choices only after successful registration and document verification. Candidates are advised to lock their choices; otherwise the last saved choices will be automatically locked upon reaching the deadline.  
\*\* Candidates who have received provisional admission letter after first and second round can proceed for admission, in case they are not participating in subsequent rounds of counselling. The need not to wait for the CSAB NEUT process to end.  
## Spot round may be conducted by respective DTE/State. Also, separate registration may be required, if conducted.

(Er. VIPULHOU LHOUNGU)  
DIRECTOR



## TIR YIMYIM YIMOBILEM (EDITORIAL)

DIMAPUR THURSDAY, MAY (AAMI) 19, 2025

### Asen lima nung asen kümzüka mali!

**A**senok rongnung jembia - jembia joko asen lima nung tangar bendangertem tsübuba agi anüngdanga tetsür tanurbo kisüng mesenzütetsüsa tensa mapang ka agi asenok menepogo. Aji oda, yakanü June 15 nü Nagatsür ka tayimtsü nung Pune nungi Dimapur tonga arur külen, Dimapur tayimtsü anendak nungi Kohima-i atutsü asoshi auto ka soter Dimapur nung taxi anendaki aotsü ashi, ajisüaka Dimapur leni alutsü melen Niuland leni anir ao aser toudak nung auto nung mener alir kati la dak tim mesüi benshitsü tenzük, anungii tsübuseta autoji anentsü asüngdang saka manen nungji lai auto rickshaw toudak nung gari nung jagi pongzükba tatalokbaji tejashitsüka aser shisabolutsüka lir. Nagatsür la dak autorickshaw toudak nung la den külemi mener tim mesüi benshitsü merangsangji tereprangtsübo tsümar saka tenüngbo Naga nung tenüng liasü. Nagatsür la jagi la dak mapa tamajung inyaksü asoshi Dimapur taxi anenba leni masü saka tangaleni anir aoer ta meteta arunungji, lai la amenba auto rickshaw toudak nung pongzüka ajentsü merangdang la kanga mejungi yiru, anungji yangji süirsüpongertemiang la mozü ki tongtsü aser ano temeket nung alirtemi auto gari anisang den pa den külemi senzüsangjia pur police nem agütsü. Iba tatalokba ya anüngdang 1:00 ako shi nung anü mer-a pua alidang atalokba ka lir. Iba jagi balaka asenok asen lima nung anüngdanga tangar bendanger tsümartem tsübuba agi, talisa, tetsür tanurtembo kija senzüsüla masü kümogo. Iba ama pei lima nung lisopurtem anüngdanga sademsadema mesenzütetsüsa akümba tensa tia ya tsümartemi yangluba tensa masü saka asenoki yangluba tensa lir. Atangji, lisopurtema sang mesüra bendanger tsümartema sang, tamajung inyaktertembo pei mapa dak alang temerenshi angutsü, ajisüaka asenok lisopurtem asoshi tekümdangtsü mapa kaji ki mapa nungi alu mapa tashi aser dokan amenba mapa nungi autorickshaw aser taxi gari anishiba mapa tashi asenoki inyaksü melen tsümartem nem inyaktaktsü tashi rongsen nunga parnok takarba akümtsü, akhüma parnok taketba asütsü, anungji asen meyong ajak madak parnok kibur kümadoktsü. Alima maparen nung inyakyim ka lir, aji shirnoki mapa inyaker alimaji parnok meyong akümer. Aji oda, tanübo asenoki asen mapa tangar nem inyaktaktsür aser asenbo kazür, anungji lia lia mapa inyaktertem takar-takarba akümdang asenok mapa meinykertem sensakba-sensakba küma odagi. Yashi tashibo asenoki tangar kilir ayu saka tanübo asenok tangar kilir mapa inyaker. Aji oda, shishilemdaka dokan kiburtembo tangar saka yangji ita sen mechimenu agia yaritepertembo liso purtem angutsü. Ibaji dang masü saka asenok lisopurtem asen lima nung tangar bendanger kishinüker kümogo. Joko, lenden limalenbo asen lu tangar bendangertem nem inyaktakja-inyaktakja parnok kibur kümer, shitakba kibursangbo alu anasa jagia moutetsüsa akümba tensa tia atalokdagi. Nagaland nung alir Naga nung mejungakasa, Naga lima ya amangtsü mang nunga tetsür tanurtem dena tetsübu makai sademsadema senzütetba lima ka lir. Ajisüaka, asenok Naga nungertemi tsümartem nem asen inyaksüba mapa aser alu dang masü saka tenünga dena agütsüba agi, tanübo tereprangtsübo tsümar saka tenüngbo Naga nung ta kümer asen lima nung tashi amshi tenzükogo. Aji oda, Nagaland nung Naga nung lisopurtemi pei tetsü oshi masü tsümar oshi jembir aser tsümartemiang Naga nung tetsü oshi jembir ta, tenünga, oshia aser tagitsüa ajak Nagaland nung tsümar meyong kümogo. Naga nung lanurtem aika kar telok ka nung aser kar telok ka nung ta kechi inyaka akümlü nung mapang tatsüka ya süidaktsüar memetet meshimetsüa jajar, idangji Naga nung lanurtemi anitsüba taxi gari aser auto rickshaw-tem tsümartemi anir aser business tilateri nungi tenzükur tulu ajak tsümartemi inyaker. Aji oda, tang tashi asenokibo asenok anogo shia achiba chiyongsü alo, beas aser dal tashia bener arua meyokteter. Ashiko, tang tashi asenok aikati kodaser Singra amtsük telongi alo lon ia adok ta süngmanga alitsüa akok ! Lisopurtem süaka iba kolok dener tuluka amato bilema kazüra, tanübo yimdong nung atalokba otsü jembir saka asüngbo asen ki kilong nung ataloktsü !

## OLEMSABANG

### Tanü tendak COVID 19 tashidak

Ministry of Health & Family Welfare, Government of India ajanga asen linük aser meketa aliba linuktem China aser Asia nung Covid-19 tashidak züina aoba ajanga nuburtem iba tashidak nungi jenbua alitsü meteta alitsü aser pei sasa teinyaktsütem kar lir. Ajaki metet, Covid-19 ya menatepa aoba tashidak, lokti tulu alidak prokshia aoba tashidak aser mekümdangra taküm samadaktsüba tashidak ka lir, saka iba tashidak ya nuburtemi angateta, asen liba liro aser inyakba ajanga iba tashidak kokteter. Anungji, nubur ajaki inyaktetsü shilem kar yamai agutsür.

- Lokti aliba tesem paidoktsüla aser takdang nung mopong peria maliba jaka nung mekazutsüla.
- Doctors, Paramedics, healthworkers aser shirangertem ajaki mask agitsüla.
- Lokti senden ajak nung mask agitsüla.
- Aketdang mesüra hachi dang romal agi teni/teping nembangtsüla.
- Mapang ajak nung teka shidoktsüla aser teka merüka ayutsüla.
- Lokti aliba tesem nung metzü memetsütsüla.
- Tangu sashiba timtem lira tangar den ajurutepa kazüba ajemtsüla aser mozükidangi oa mozü aser nungdakbatem agitsüla.

India nung taküm 2025 nung tang tendak Covid-19 agi shirangba yimya ya kanga tesashibo masü (mild) aser mozü ki bushitsüsa shirangba mali.WHO-i osang agutsüba agi, global health risk ya kanga agi tajemba li. Saka, shirangba yimya bulua adokba kar yamai agutsür.

- Tanemi temang metaa shirangba aser süksena aitba.
- Terok tera akongba.
- Neptzü ayimba
- Mapang shia alok metzü madoki aketba.
- Tekolak anguba aser yakta belemba.
- Tepok aoba.
- Tanemi temang ayangba.
- Teni agi memenemtetba aser temeli agi metendangtetba.

Iba dak sendakba nung teinyaktsü aser meinyaktsü kar nuburtem kumzuka alitsü asoshi agutsür.

#### Teinyaktsü (DO's)


- Teti teka second 20 bo sa sapon agi shidoktsüla.
- Lokti aliba tesem nung mask inoktsüla aser tangu sashiba yimya meteta alitsüla.
- Anasa alirtem den pilaa alitsüla.
- Na temang nung teimtem kar lira kidang kazüang aser temang anepalurtemden tongteprateptsüla.
- Aket dang aser hachi dang teni aser tepang nembangtsüla aser nai tangshiba tesemtem teti meruka ayutsüla.

#### Meinyaktsütem (DONT's)

- Na temang manemi lira züba züba meyutsütsüla aser lokti alidak maotsüla.
- Shiranga aliba nisung anasa maotsüla aser teka meshidoki tejak nung metangshitsüla.
- Pei indang mask aser tzü bottle lemsa makitsüla.
- Na aser tangar ajak kumzuka alitsü atema item tetoyubatem inyaksüla aser molung toka aliba nubur aser lenmangtem den angatetteptsüla.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

## Khristan lenirtemi Israel nung yimjung atema sarasademtsü ayongzüker



Franklin Graham & Greg Laurie

**June 18, 2025:** Israel-i Iran amakba sülen Middle East nung ano tensa tamajungba akümba mapang nung Khristan lenirtemi yimjung atema sarasademtsü ayongzüker.

Pastor Greg Laurie-i, "Asenoki Israel atema maneni sarasademtsüsüla, kechiyong Iran nung missiles ajanga parnok maneni amaker," ta metetdaksü.

"Tsüngremi parnok kümzüker aser region nung yimjung lidakjang ta sarasadem. Kechiyong Laishiba ajanga yamai ashir, 'Na sensakertem atema tejenokdak liasü, nüngdakbapurtem atema tejenokdak, yipru nungi jenokdak aser tatsük nungi akhüm angudak liasü' (Isaiah 25:4)," ta Laurie-isa lemsatop.

Israel pusema sayutsüingir Franklin Graham-i, "Iran-i, parnoki alima map nungi Israel samatsüner ta shiogo. Parnoki America-a samatsüner. Iran ya kiralongrartem sponsor asüba

linük ka lir," ta metetdaksü.

Franklin Graham-isa, "October 7 nü Israel amakbaji Hamas-i lir aser Hamas telok ya Iran-i aziöker. North tsütülen nungi Hezbollah teloki Israel amaker, aser iba telok ya-a Iran-i aziöker. Anogo shia Israel tsütülen missiles khadoktsü atema Iran-i Houthis telok amshia arur, aser iba telok ya-a Iran-i aziöker," ta metetdaksü.

"Taoba hopta ni Israel nung liasü, aser iba mapang nungi Houthi-i missiles sashia yokba ajanga onoki aiben tejenokdak bushia liasü. Iba ama tensaji yangi US nunga ali nungbo asenoki koma süla. Israel ya pasasa parnok kümzüker alitsüsa kümogo, aser parnoki asen sarasadem nungdaker," ta Graham-i metetdaksü.

"Kibuba Yisu Khrista dak amanger ajaki 'Yirusalem nung yimjung atema sarasademtsüsüla' (Tenüngsang Ken 122:6). Iba tensa tekeraba nung bentetsü atema sarasademtsüsüla," ta

paisa mepishia metetdaksü.

Pope Leo-ia Israel aser Iran naprongla dang ken o jembiba ajanga mangatetep ajak bentetsü ayongzüker.

Pope-i, "Shinga-ia shinga amokmeren masütsüla. Tanü-asüng osangtem ajanga tebilemsü tulu akar. Iran aser Israel nung tensa kanga mejungi kümogo. Tang ama tensa ka nung asentenshir shisa kaa inyaksü ni ajungshir," ta metetdaksü.

Tawa Iran aser Israel na nung tensa kanga mejungi akümba sülen World Prayer Centre-ia Middle East nung yimjung atema sarasademjang, ta ayongzüker.

"Israel aser Iran na tsüngda rara tamajungba dang akümba mapang nung Middle East atema sarasademjang. Azü tokshiba anentsü atema onoki sarasadem. Aria bilemba, taochi aser atsü-anema akatsü atema onoki sarasadem," World Prayer Centre-i metetdaksü.

## Pakistan nung Tsüngrem mezüngmeshiba ozüng tim mesüi amshir: HRW

**Lahore, June 18 (Agencies):** Pakistan nung Khristantem densema minorities anema inyaksü aser mangatetep adokdang mangyangtsü atema Tsüngrem mezüngmeshiba ozüngtem tim mesüi amshir, ta Human Rights Watch (HRW) report ajanga metetdaksü.

Loktii nisung tepsettsü, minorities jenshidaktsüsü aser kiojen rakzüka agitsü atema Tsüngrem mezüngmeshiba ozüngtem tim mesüi amshir, ta "A Conspiracy to Grab the Land: Exploiting Pakistan's Blasphemy Laws for Blackmail and Profit," ta ajaba report ajanga metetdaksü.

"Tesüiba mapang nung aibelenertem anema ken o benoka mejembiba ajanga aibelenertem temelung taliba uludaktsür. Iba dak alia item ozüngtem amshirtemia yimsü nung ajemdaker amokmerener aser rakzükrakter," ta HRW associate Asia director, Patricia Gossman-i metetdaksü.

Laisa, iba ozüng ya hadir ama amshiba nokdangtsü

atema Pakistan sorkari tangsa Tsüngrem mezüngmeshiba ozüngtem yanglushitsüla, ta ashi.

Yaküm May ita nungi tenzüka taküm January ita tashi nung HRW nung research agirtemi Pakistan nung Tsüngrem mezüngmeshiba ozüng kübok tai tonglokja alir nisung 14 interview agiba den külemi Pakistan yimtiba, Lahore aser Punjab province kübok Lahore, Gujranwala, Kasur aser Sheikhpura nung lawyers, judges, meimchir temeden atema inyakertem aser osangbenertem aika interview agia iba report renema liasü.

HRW den jembidang Lahore nung arrshi küm 52 Khristan tetsür kati, lai beauty salon ka nung mapa toktsüba sülen lai bendenba rongsen agi la meyong salon ka lapok, ta ashi.

Laisa, la mezüng inyakba salon kiburi la itasen tutsüsü anungji mapa tetoktsü ta ashi, saka lai mapa toktsüba ajanga 2019 küm November ita nung

Muslim nung telok kati la den lar staff tem dak azük. Lai Quran kaket raksatsü, ta la nem tai tonglokja liasü.

Yamaji nija mangatetep nung ajemdaker Tsüngrem mezüngmeshiba ozüng kübok Khristantem nem tiyazü nung tai tongloktsüba tatalokba aika lir.

Pakistan nung Tsüngtem mezüngmeshiba ozüng kübok aibelenertem nem tasüba temerenshi agütsüsü akok. Tang tashi nungbo iba ozüng kübok ketdangsertemi shinga nem-a tasüba temerenshi agüja mali, ajisüaka iba ozüng kübok tai tonglokja alirtem loktii tepseter. Tesüiba küm ter tsüngda loktii nisung ter dak tali tepsetogo.

HRW-isa Pakistan sorkar dang tangsa Tsüngtem mezüngmeshiba ozüngtem agienang, iba ozüng kübok tai tonglokja alirtem jail nungi chiokang aser iba ozüng dak sendakba nung nisung tepsetba aser kiojen raksatsüba tatalokba ajak bushisüngdang, ta takhangba agütsü.

## ANO GO ABEN TSÜNGREM DEN

### Taidok kü meyong

"Nisung kari kar anema tai agütsüsü lira, nenoki medemer o medemer na talangka arernzüka tai toktepang" Kolosi 3:13

Tekümtet angutsü asoshi tematiba jenjangji temenen taidok angubaji lir. Kari Kibuba Yisu Khristaji kümtetdakba ta amanger, saka tasütsü tonga temenen taidok anguba memeteti lir asür. Tanü azüngba Lai nung temenen taidok angutsübaji asenoki taidok agutsüsü asoshi kodaka bilema lir, iba dak aket ta sayur. Tain makümba Khristan kari asenoki teti taidok nangzükerba dak keta lir ta bilemer. Ibaji Lai tesayuba süra, asenoki taidok bushiba nung mapang indoktsüla. Saka temenen shia bilemtetsüji takoktsü asü ?

Kolosi 2: 13 nung temenen ajak taidok agütsüba indang ashir. Asenok temenen taidok anguba indang ashir. Asenok temenen taidok anguba tejangjatiba kuliji ibai lir. Kechiba Tsüngremi taidok agütsür ? Temenen taaji tasüba ta asenoki bilemteter. Khristai temenen taaji pa asüba ajanga ajak küpdang, shirnoki amang ajak nüji kümdaktsü. Khristaji kümtetdakba ta amangba tamang Khrista dak ayuba ajanga, Tsüngremi taochi agi temenen ajak adoker.

Tsüngremi Pai taidok agütsüba mebilemtetsü shimtet. Asenoki temenen bilemteta ali tashi tetsübu temenentem asenok nem bilemtetdaksüsü meranger. Taidokji Khrista dak amangba tamang nung amendaker kenyongi adoker.

## Ghaziabad nung pastor ka den Khristan yimsü agizüker ka apu

**June 18, 2025:** June 15, 2025 nü Uttar Pradesh kübok Ghaziabad yimti nung police-i pastor ka den Khristan yimsü dangi meyiper ka na puogo.

Bajrang Dal züngsem kati ken o benokba nung ajemdaker Khristan anaji apu.

Pastor Vinod Kunjumon ya Kerala nungi lir aser tang pa Sahibabad nung telidak. Ano Khristan yimsü dangi meyipsang Premchand Jatav ji Ghaziabad kübok Rahul Vihar nung alir.

Bajrang Dal telok nung züngsem, Prabal Gupta-i Crossings Republik police station nung ken o ka benokba nung ajemdaker tena apu.

Gupta-i, teyari balala agütsüsü ta mesüzüka tangartem Khristan yimsü dangi meyipdaksür, ta tai tonglokja liasü.

Ajisüaka kiyonger ka, Satish Anand-ibo, "Pai (pastor) Amongnü anogotem nung sarasadem sentong dang ayongzüka agir. Sarasadem sentong nungji Rahul Vihar aser Buddh Vihar ama anasa aliba tesemtem nungi nisungtem arua adener, ajisüaka Khristan yimsü agizüktsü atema pai shinga majungshir," ta metetdaksü.

Assistant Commissioner of Police (ACP) Wave City, Priyashri Pal-i, "Onoki iba ken

o bushisüngdangdar, ajisüaka tang tashi nungbo kuli tejangja mangu," ta metetdaksü.

Küm 20 tejaklen Premchand Jatav-i Hindu yimtsü toktsür Khristan yimsü agizüka liasü. Pai Amongnü shia par kidang sarasadem sentong ayongzüka agir.

Police-i ashiba agi, Khristantem sarasadem setnong nung adenba ajanga Jatav'er jala taneptsü anguba sülen pai Khristan yimsü agizüka liasü.

Tesüiba küm pezü tashi Pastor Vinod-i Amongnü anogotem nung Jatav'er kidang sarasadem sentong lenia arudar.

Jatav'er kidang yimsü meyipdaksüba sentongtem agir, ta osang angashiba sülen Bajrang Dal züngsemtem Jatav'er kidang aoba mapang nung par kidang tetsür 20-25 shi sarasadem sentong tagidak liasü.

Gupta-i police dang, "Küm aika tejaklen Premchand-i Khristan yimsü dangi meyipa liasü aser iba mapang nungjagi tenzüka par kidang Amongnü anogotem nung sarasadem sentong agir. Parnoki iba sabangji amshia tangartem Khristan yimsü dangi meyipdaksüsü meranger," ta metetdakja liasü.

AO OSHI ANGAZÜKDAK:

TANÜ ANGAZÜKTSÜBA OJANG



Teo

(adj) tulua masü tilaa masü, teyari ka (medium, average size)

\*Ozü benjong nung achitsü ak teo ka ali.

Tepakpak

(n) menüngdakba o tali jembiba, tali jaja ( palaver, useless talk)

\* Lokti nung tepakpak o jembir menüngdaker.

OLONG PAITEP # 7184

Grid for OLONG PAITEP # 7184 with numbers 1-15 in various cells.

TIPIEN

- 1. Balaka - (5)
6. Aika shirangba - (4)
7. Tar tatsü - (6)
9. Nenü'er jabaso - (4)
10. Sen latettsüba - (7)
11. Tangar kübok alir - (4)
14. Lon nung inokba - (6)
15. Tzü ayimdak - (4)
16. Ajok - (5)

LANGTSÜNGLEN

- 2. Hai sür inyak - (4)
3. Aor tenüng ka - (6)
4. Ali telungi talangka lur - (5)
5. Tebang kenyongi mazüoker - (4)
8. Ken atema anenzükertem - (5)
9. Toktepa noktak - (5)
10. Sen - (6)
11. Benjong agi - (5)
12. Telung nung rizünga ayu - (4)
13. Tebang nung enok - (4)

OLONG PAITEP # 7183 TELANGZÜBA

TIPIEN :

- 2. Tebenjem, 5. Talila, 8. Tang,
10. Temokok, 11. Amar, 14. Mezüng, 15. Mokobung.

LANGTSÜNGLEN :

- 1. Tatem, 3. Bala, 4. Jepdak,
6. Leper, 7. Angi, 8. Totzü, 9. Mado, 10. Tatsük, 12. Angur,
13. Tebu.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Sonam Raghuvanshi tedii narco test agitsü mulunga agizüker

Guwahati, June 18, 2025

(Agencies): Raja Raghuvanshi tepsetba ken o atema Sonam tedii narco test ka agitsü mulunga agizükogo. Raja'er kibongi mepishiba sülen pai iba test agitsü mulunga agizük.

Raja Raghuvanshi tedi tambusangi Sonam aser lar tsürarurtem dak narco-analysis test asütsü takhangba agütsü. Raja tepsetba nung ano nisung aika densema alitsü ta pai temlung melemba ashi.

"Kechi ochi liasü ni media aser parnok dang shiogo. Iba amaji ser ano tarentakba kar lira parnoki bushisüngdang asütsü akok, onoki yariteptsü mulunga dang lir" ta Sonam tedi Govind-i osangbener dang ashi.

"Parnoki narco test asütsü akhanger süra ketdangsürtemi test ji agitsü akok" ta paisa ashi.

Meghalaya Police nung Special Investigation Team (SIT)-i Mongulbarnü Raja tepsetba indang crime scene yanglua liasü. Sonam aser nisung asem dena iba mapa inyak.

"SIT-i tesem aika semdanga liasü. Onoki parking lot nungi tenzüker aser idak nung jagi viewpoint-i ao aser pa metepsetang shirnoksa liasü jangjaogo" ta East Khasi Hills Superintendent of Police Vivek Syiem-i ashi.

Vishal-i Raja dak mezüng teka sangshi, iba sülen Anand aser Akash nati teka sangshi.

Raja tepsetdang amshiba nok ka ano mangu lir aser SDRF teams-i ibaji bushidar.

Raja Raghuvanshi indang mobile phone ji Sonam aser Vishal nati raksa ta SP Syiem-isa ashi.

BTR districts nung TET-qualified teachers 1,337 shim

Udalguri, June 18, 2025

(Agencies): Assam nung Bodoland Territorial Council (BTC)-i Bodoland Territorial Region (BTR) nung Teacher Eligibility Test (TET) nung takok angur nisung 1,337 nem appointment letters agütsüogo.

Udalguri College nung BTC Deputy Chief Executive Member Gobinda Chandra Basumatary-i appointment letter agütsü.

Tesayur tasentem rongnung post-graduate 137 aser graduate 1,200 lir. BTR-i parnok district 5 nung Middle English (M.E.) aser High Schools nung mapa lemkütsütsü.

BTC Deputy Chief Executive Gobinda Chandra Basumatary-i parnok ajak nem tenüngsang agütsü aser nendaka inyaksü ayongzüük.

"Shisaliok chichiba ya textbooks dang masü saka lanurtem akasodaktsüba aser parnok nisungchi kümdaktsüba lir" ta Basumatary-i ashi.

DIMAPUR YAONGYIMSEN LONGKUM SAYIR KIDONG DIMAPUR : NAGALAND

KONANG TETUSHI AGÜTSÜR



Late Er. N.T. Longkumer aser Late Thejano-er jabaso Wb. ALIAWATI LONGKUMER (Indian Foreign service) Ministry of external affairs, Government of India-i Democratic People's Republic of Korea (North Korea) nung India Ambassador inyaksü shimba asoshi Yaongyimsen Longkum Sayir kidong, Kidong Telongjem Dimapur unit, aser Elangtsür Telongjem ajaki konang tetushi tulu agütsür.

Tsüngremi nür kibong aser nü wadang nung maneni len ania moajangma ta sarasademtsür.

DR. LONGERONEN LKR. (Secretary) Dimapur Yaongyimsen Longkum Sayir Kidong

S. ALEM LKR. (President) Dimapur Yaongyimsen Longkum Sayir Kidong

Arunachal nung NPP MLA 4-i PPA nung aden



Guwahati, June 18, 2025

(Agencies): National People's Party (NPP) nungi MLA pezüii People's Party of Arunachal (PPA) nung denogo.

Arunachal Pradesh nung regional party ka dang alibaji PPA lir aser Namgey Tsering, Pesi Jilen, Tapi Darang, aser Oni Panyang nungeri PPA nung züngsem aküm.

2024 state assembly elections nung NPP-i menden 5 aser PPA-i menden 2 nung takok nguteta liasü.

Tawang constituency nung Namgey Tsering-i BJP candidate Tsering Dorjee madak takok angu. Mariyang-Geku nung Oni Panyang-i BJP candidate Olom

Panyang madak takok angu. Pesi Jilen-i Nyamar Karbak aser Tapi Darang-i Kaling Moyong madak takok ngua liasü.

Parnoki party toktsüba ajanga NPP nung MLA ka dang lir aser paji Thanwang Wangham lir. Pa ya NPP state president lir.

PPA president aser MLA Nabam Vivek-i lennir pezü pelashishia agizük aser parnoki tatemzüka kecha melii dang adener ta ashi.

"MLA pezüii ozü lenisüba nung temulung alemba atema pelar. Joko onok MLA 6 lir aser tang nungi onok constituency tem tajungba tenzüktettsü" ta Vivek-isa ashi.

PPA-i maneni Chief Minister

Pema Khandu lenisüba kübok BJP sorkar pusema nungittsü ta paisa ashi.

"Onoki NPP akhümtsübur saka regional taginübatem ajungkettsü atema onoki PPA shim. BJP nung adentsübaji tang mejembi tajungba parnok nungi osang kecha mali aser onokia parnok den adentsü tebilemba kecha mali" ta Tawang MLA Namgey Tsering-i ashi.

"Onoki parnok election campaigns nung item MLA tem pusema nungit aser party nung tongti shilemtem agütsü. Party dak tai kecha meliaka parnoki toktsür aoba ya ashioktsüba lir" ta National General Secretary (Organisation) Paknga Bage-i ashi.



Tripura nung Government Railway Police (GRP)-i Agartala Railway Station nung Eskuf cough syrup pongdang 1,580 apu. June 18 nü GRP-i Deogarh Express nung Coach No. NFR-204751 aser General Coach No. NFR-174070 nung pongdangtem apu.

# Alima tesendaktep nung mepetmesü lir: Zelenskyy



**Ottawa, Aami/June 18 (Agencies):** Ukraine bhukuma lenirtemi telungjem nung sangdong kata magütsüi Canada nung Group of Seven senden tembangogo aser Ukraine Tir Volodymyr Zelenskyy-i diplomacy mepetmesü nung lir ta ashi.

Alima nung industrial democracy tulutem senden Kananaskis nung amenba ya Mongulbar aonung tembangogo, aser alima nung ken o tongtipang tem nung telungjem sayutsü tebilemba liasü.

Ajisüaka taoba mapang iba telok lungjemer Russia-i Ukraine anema tashiyim amshiba aitsüba ama masü, tan

senden nungbo iba linük bhukuma sangdong kata magütsütet, anungji iba telok tsüngta telemsa adokba ajiteter.

Zelenskyy-i iba mungdang tembangba anogo nung Canada, United Kingdom, France, Germany, Italy aser Japan lenirtem den külemi NATO chief Mark Rutte ajurua liasü. Ajisüaka iba telok nung tashi tukutiba züngsem, United States Tir Donald Trump den majuruteptet, kechiaser pa Israel aser Iran tsüngta rara tenzüka aliba Washington nungi bentetsü asoshi anogo ka jelia iba mungdang yutsür ao.

Zelenskyy-i iba senden temer jembidang, pai tanünga

G7 lenirtem dang diplomacy mepetmesü nung lir ta ashi aser parnok dang maneni Trump dang rara tembangsü asoshi pa tashi amshitsü ajungshi ta shiogo, ta ashi.

Iba senden amentsü lia Canada ketdangsür kati osangbener den jembidang, iba senden nung Ukraine dak sendakba nung joint statement ka agütsütsü sentong aliba US-i memulungba yong yutsü, ta shia liasü.

Ajisüaka Canada ato kilonser indang odongtar Emily Williams-i mapang tatsüka lir iba sangdong meyipa agi aser danga lenirtem nem Ukraine dak sendakba sangdong atema kecha lema magütsü ta shia liasü.

Trump-i maneni Russia Tir Vladimir Putin den yimjung asoshi jembishinüba yong Ukraine atema joint statement agütsütsü kodanga memerang, ta Canada ketdangsüri ashi.

Hombarnü Trump-ia telok tsüngta Russia asoshi tangatetba balala aliba angatetdakja, 2014 küm Russia-i Ukraine indang Crimea rakzüka mechi G8 nungi Moscow atsüngdokba ya aibelen liasü ta ashi.

# Israel-i aibelen mapa tulu inyakogo: Khamenei



**Tehran, Aami/June 18 (Agencies):** Iran indang Supreme Leader Ayatollah Ali Khamenei-i Israel dang timtem tulu ajurutsü ta tekumdangtsü ashi aser Israel-i amakba nung Tehran-i tashi agi tayang kepzüksü ta ashi. Linük ana tsüngta anünglen nungi maktepba rara tenzüker anogo trok ajunger.

Tang tesüsa rara tenzüker tang mezüngbuba linük den television ajanga jembidang, Tehran-i surrender masütsü mesüra tashiyim agi yimjung mesüra rara benokba magizüksü ta ashi.

"Zionist yimli-i aibelen mapa tulu inyakogo aser par inyakyim asoshi merenshitsu. Parnoki asen tangatetba mechi tepsetba mekepzüki metoktsütsü aser par linük indang airspace nung aibelenba manentsü," ta pai ashi.

Pai ano United States danga Iran-i surrender masü aser US-i makra meyanglutettsüsa timtem ajurutsü ta tekumdangtsü ashi.

"Asen armed forces temi ketdangsür aser nukmen ajak teyari nung asen tasoli kumzüka ayutsü renema lir. Iran linüki surrender masütsü ta America nungeri metettsüla aser par mitkari teka sangshira meyanglushitettsüsa teraksa agütsütsü," ta pai ashi.

Tir Donald Trump-i Khamenei amokmerena aser Islamic Republic ya talenba

kecha makai bendanga agütsütsü akhangba sülen pai US dang iba o ya ashi.

Truth Social post ka nung US tiri Iran dang Tehran indang anüng ajunga parnoki amokbanga lir aser Khamenei kong aliar meteta lir ta shia liasü. "Asenoki tang atema pa metepsettsü. Ozüi aremzüka samaa otar," ta Trump-i ashi. Paisa minute ishika lir Iran dang condition kecha makai bendanga agüjang ta khang liasü.

Iba sülen Khamenei-i, "Tongpang tenzüko. Khaybar-i Ali meyipa shilanger," ta langzü. Mapang tatsüka lir, "Asenoki kiralongrar Zionist yimli nem telanzüba tesashi agütsütsüla. Asenoki Zionists dang taochi mesayutsü," ta sangdong.

Iran aser Israel tsüngta raraba Bodhbarnü tesashiba akum aser linük ana tsüngta rara tenzüker anogo trok jungogo. Bodhbarnü Israel-i tayimtsü amshia amakdang Tehran nung Mehrabad airport anasa District 18 nung densema apokba ola angashi.

Taoba Hokulbarnü nungi tenzüka Israel-i Iran tesem balala amakdang nisung 585 tepsetogo aser 1,326 yirua lir, ta Iran indang Health Ministry ajanga Bodhbarnü ashi.

Kasa mapang Iran-ia Bodhbarnep Tel Aviv tesem kar nung missiles khalokja teraksatsüba jenti liasü.

# Cambodian nunger meyirejang aikati sorkar rally nung shilem agi

**Phnom Penh, Aami/June 18 (Agencies):** Thailand den tang arrtsü dak sendakba nung mangatettep adoker aliba mapang sorkar pusemstsü atema Cambodia nunger meyirejang aikati Bodhbarnü state-i ayongzüka rally nung shilem agiogo. Taoba ita Cambodia nunger sepai ka asüba sülen iba mepetmesü ya tenzüka liasü.

Kidanger ana ya arrtsü 820-km (510-mile) lir aser arrtsü nung tesem karbo tang tashi kanga junga benteta mali, kong temple tejentem densema lir, koba linük anapronglai parnok meyong ta shia küm aika iba atema toktepa arudar.

Tensa süngjemshidaktsütsü atema ketdangsürtemi Phnom Penh nung senden ka ayongzüka agiba sülen anogo ishika lir rally ya ayongzüka agiogo. Ken o tembanga sensak mesemtet, saka linük anapronglai maneni sensaksemstsü nangzüktepogo.

Rally nung shilem agirtemi Cambodia wako ayipshia yimyim balala ayim aser Ato Kilonser Hun Manet aser pa tebu taoba PM Hun Sen indang indang noksa bener rally nung shilem agia liasü. Rally ya Ato Kilonser tenu deputy premier Hun Many-i anir agi, kong monk tem aser kaketshirtemia shilem agia liasü.

Cambodia indang ali! onoki tangar ali magütsü saka onok alibo magütsütsü!" ta yimyim ayima liasü.

Bodhbarnüsa Cambodia indang defence ministry-i ashiba

agi, Thailand-i parnok sovereignty anema maneni inyaksangshio.

"Thailand-i arrtsü len drone amshia, kilentsü tua aser sepaitem yoka inyakyimtem tali benoka inyakdar," ta ministry-i ashi. Ajisüaka iba taitsüba ya Thailand-i magizük.

"Item kilentsütem ta Thai sovereign territory kübok lir anungji onoki MOU 2000 nung aibelen ta ashiba ya onoki magizüker," ta foreign ministry otongdar Nikorndej Balankura-i 2000 küm tezüluba nung tenangzüktepba yangluba tetshia jemi.

"Thailand-i arrtsü nung inyakyim majungketshi," ta pai shisem.

Sorkar anapronglai nüburtem aziüoka sensaksem ajanga ken o bentetsü nangzüktepogo, saka Bangkok-i arrtsü akangshio aser kidanger nem electricity supplies magütsütsü amokmerenogo.

Phnom Penh-ia, parnoki Thai electric power, internet bandwidth aser tanga osettem malitsü ta sangdongogo. Sorkarisa local television station tem dang Thai nunger film tem mesayutsü tetuyuba agütsüogo.

Cambodia ya France indan colony ka aliba mapang 1907 küm map yangluba sülen linük ana ya küm noklang ka dak tema arrtsü junga lateta maliba tesemtem nung mangatettep adoka arudar.

# Volcano pokteta adokba sülen Bali-i aoba tayimtsütem thitsü

**Jakarta, Aami/June 18 (Agencies):** Mount Lewotobi Laki-laki nung volcano pokteta adokba sülen Indonesia indang resort island Bali-i aoba aser aruba tayimtsü 20 dak tema thitsüogo mesüra mapang melenshitsuogo aser East Nusa Tenggara province nung airport asem shibangtsüogo, ta ketdangsürtemi Bodhbarnü metetdaksü.

Mount Lewotobi Laki-laki, koba East Nusa Tenggara province nung lir iba tenem Mongolbarnü pokteta tugua mitsü anüngleni km11 dak tema pokteta yoka liasü aser iba ajanga linük volcanology agency-i tekümdangtsü metetdaksütsüsa aküm.

Maneni Bodhbar anepdanga volcano ya tanaben pokteta tugu, ta agency-isa metetdaksü.

International aser domestic tayimtsü 26 thitsü mesüra mapang melenshitsuogo, ta Indonesia Transportation Ministry-i ashi aser iba ajanga passenger 14,000 dak kongshio.

Tayimtsü thitsübatem rongnung India, Singapore aser Australia nungi Bali-i aotsü aliba tayimtsü 14 densema lir, ta Bali international airport website ajanga sayuogo.

Singapore Airlines (SIAL.SI)-i Bali indang Denpasar airport aser Singapore na tsüngda senzüba tayimtsü pezü thitsü aser Scoot-ia Bali aser kidanger asetkong

Lombok-i aoba tayimtsütem thija liasü, ta airlines yagi ashi.

Qantas' (QAN.AX)-ia, Australia nungi anepdang Bali-i aotsü aliba tayimtsütem aika thitsüogo aser nikongtsütsü aotsü aliba tayimtsütema thinentsütsü imlar.

"Forecasts ajanga mitsü ya taonung tashi nungbo asemshia aotsü imlar," ta JetStar-i ashi.

Bali, Lombok aser Labuan Bajo nungi oli aruli ta senzüba AirAsia Malaysia aser AirAsia Indonesia nati achaayangba tayimtsütem aika thitsüogo mesüra thinentsüogo, ta company sangdong ka ajanga metetdaksü.

Sorkari Bodhbarnü nungi Brehostibarnü tashi East Nusa

Tenggara province nung Maumere indang Fransiskus Xaverius Seda airport densema airport asem shibangtsüogo, kechiyong passenger tem kümzüka toktsütsüji ajak dang tongtibangba lir, ta transportation ministry-i ashi.

Volcano pokteta adokba ajanga ketdangsürtemi iba tesem anasa aliba yimtsüng ana nung alirtem anina liasü, ta local disaster mitigation agency ketdangsür kati Reuters dang ashi.

"Yimtsüng ana nung yimtsüng mitsü, longjang aser lisem agi süngogo," ta lai ashiba den lendong nung nisung asüba osangbo kecha mali, ta shisem. Iba volcano ya tatemsa May ita pokteta adoka liasü.

## NSL U-20 Scholarship Team IIS nung training agitsü



**Dimapur, Aami/June 18 (TYO):** NSL U-20 Scholarship Team training asoshi mao tsüngda June 17 nü Nagaland Olympic Association Office, Sovima nung sentong ka agiogo, koba U-20 atema NSL Scholarship kübok tongtibang sentong ka lir.

Iba sentong ya Nagaland Super League (NSL), Nagaland Olympic Association (NOA), aser Inspire Institute of Sport (IIS), JSW nunger longjemer Nagaland nungi lanur football asayartem anitetsü nükjidong nung tenzükba lir.

Iba sentong ya asür Atuo Mezhür nem tetushi agütsüba sentong tatsüka agi tenzük aser iba sülen CRC Sovima Pastor Rev. Zhou Sanchu-i sarasadem ka ayongzüka agi.

Sentong nung Advisor to the Chief Minister & Chairman, IDAN; Vice President, Athletics Federation of India; Secretary General, Nagaland Olympic Association Abu Metha; Chairman, NSL; General Secretary, Nagaland Football Association (NFA) Benei M. Lamthiu; Mughato Aye, Vice President, Nagaland Football Association; Kuputo Shohe, Joint Secretary,

Nagaland Olympic Association; Neivikuolie Nicholas Khatsu, Assistant Secretary General, Nagaland Olympic Association nungeri shilem agia liasü.

NSL U-20 Scholarship Team nung asayar 16 aser support staff 3 densema lir aser parnok June 8 nungi July 7 tashi ita ka fully-sponsored high-performance training program ka nung shilem agidar. NSL-i, tayimtsü ticket, tanendak aser shilem agirtem atema itashia allowance densema senotsü intokba ajanga ayimjemtsü. Mezüngbuba shilem (8th-18th June, Chümoukedima) anogo 10 agiba ya fitness, tactical readiness, aser mental conditioning dak rangloker agiogo aser SC

Nagaland Thonburi United den Chümoukedima Football Stadium nung friendly match-a ka asayaogo.

Tanabuba shilem (18th June-7th July, Inspire Institute of Sport, Bellary) ya IIS nung anogo 20 nü agiba elite-level training program ka asütsü. IIS nungi Neeraj Chopra, Bajrang Punia, aser Sakshi Malik nunger amala nüngtugu asayartem anitetogo aser Olympic nung medal anguba densema

international asayamungtem nung iba facility nung anitetba asayartem medal 243 dak tema nguogo.

Iba den bendenloksema Bengaluru FC den longjemer asayartem club indang academy den training agitsü, friendly asayatem nung shilem agitsü aser professional football environment indang meteta kümdaktsütsü.

Kasa mapang nung training mapang Nagaland Chief Minister-i Inspire Institute of Sport semdanga asayartem aser coaching team den sensak asemtsü.

### **Camp nung shilem agirtem:**

**Defenders:** Nokwang Konyak; Kevisekho Miasalhou; Thejangulie Zatsu; Rovizo; Neingusalie Timothi Soliezu; Hesaka V Chophi.

**Forwards:** Arap Konyak; Ngansang K Phom; Rokoselie Rhitso; Vinato Achumi.

**Midfielders:** Ato Chopi; Ketouselie Miasalhou; Mangkholen; Paotinsat Sitlhou

**Goalkeepers:** Changsomba Chang; Mengulhoukho Chalieu.

**Coaching & Support Staff:** Khogen Singh - Head Coach; Khwetelhi Thopi - Assistant Coach; Kechi - Assistant Coach.

## Evans aser Kvitova na nem Wimbledon wildcard agütsü

**Aami/June 18, 2025 (Agencies):** Taoba mapang British nunger number one asayar Dan Evans nem Wimbledon tebur kija asaya atema wildcard ka agütsüogo. Iba asayamung ya iba ita tatemlen asayatsü.

Arishi küm 35 tain Evans ya tawa top 200-i iogo aser taoba mapang world number 21 asayar yagi küm ana tsüngda asaya tulutiba ka akokba sülen tang iba osang aruogo.

Kasa mapang nung Wimbledon tetsür kija asaya anaben tashi koker alila Petra Kvitova nema wildcard ka agütsüogo, koba direct entry atema ranking agi matongba asayartem nem agütsür.

Czech tsür taoba mapang world number two asayar Kvitova ya Bodhbarnü wildcard agütsürtem sangdongba nung British nunger masür la kija lir.

Taoba küm US Open girls' champion Mika Stojsavljevic aser iba ita tetenzüklen French

Open girls' finalist Hannah Klugman na nema main draw nung asayatsü atema maongka agütsüogo.

Jodie Burrage, Harriet Dart, Francesca Jones aser Heather Watson nungera parnok den adentsü, saka French Open semi-finalist Lois Boisson bo mezüngoksem.

Grass-court Grand Slam asayamung ya All England Club nung June 30 nü tenzüktsü.

Evans-i taoba küm pai Wimbledon wildcard ka memeshiner ta shia liasü. Ajisüaka lower-tier ATP Challenger Tour nung maneni temulung agüja asayaba sülen world number 199 asayar nem ya All England Club-i iba maongka agütsüogo.

Evans-i ashiba agi, world's top 100-i aitsü pa dak tashi lir ta bilemer, koba Grand Slam nung direct entry atema teperi lir.

Hombarnü pai Queen asayamung mezüngbuba round

nung world number 13 asayar Frances Tiafoe koka liasü.

British nunger asayar Jack Draper, Emma Raducanu, Katie Boulter, Sonay Kartal, Jacob Fearnley, Cameron Norrie aser Billy Harris nunger iba asayamung nung indang indanga asayatsü temsüa lir.

Bodhbarnü wildcards ya British nunger tebur asayar tenet nem agütsüogo aser hopta ishika tsüngda ano ka shimba sangdongtsü.

Tebur kija asaya atema wildcards angurtem rongnung Jay Clarke, Oliver Crawford, Dan Evans, George Loffhagen, Johannus Monday, Jack Pinnington Jones, Henry Searle nunger densema lir.

Tetsür kija asaya atema wildcards ya Jodie Burrage, Harriet Dart, Francesca Jones, Hannah Klugman, Petra Kvitova, Mika Stojsavljevic, Heather Watson, Mimi Xu nunger nem agütsüogo.

## Premier League 2025/26 fixture sangdongogo

**Aami/June 18, 2025 (Agencies):** Taruba Premier League season atema fixture Bodhbarnü sangdongogo aser August 15 nü champions Liverpool aser Bournemouth na Anfield nung asaya-a tenzüktsü.

Alima nung ajaki kanga sapua reprangba league tenzükter mezüngbuba hopta Manchester City pur Wolverhampton nung oa asayatsü, Unai Emery-i aniba Aston Villa team-i Eddie Howe-i aniba Newcastle United team host süa asayatsü, shirnok taoba season pongububa nung tembangba sülen UEFA Champions League atema qualify süogo.

Brighton pur Fulham den asayatsü aser Nottingham Forest pura Brentford den asayatsü. Second division nungi promote asüba Sunderland team mezüngbuba asaya West Ham den asayatsü aser UEFA Europa League champion Tottenham aser Burnley na asayaba angutsü.

UEFA Europa Conference League winners Chelsea aser

FA Cup winners Crystal Palace na mezüngbuba Deobarnü asayatsü aser mezüngbuba hopta asaya tulutibaji Ruben Amorim-i aniba Manchester United aser Mikel Arteta-i aniba Arsenal na asaya ya asütsü. Maneni Leeds United aser Everton na Elland Road nung asaya-a mezüngbuba hopta tembangtsü.

Arsenal pur atema Manchester City pur Aston Villa nung oa asayatsü, Unai Emery-i aniba Aston Villa team-i Eddie Howe-i aniba Newcastle United team host süa asayatsü, shirnok taoba season pongububa nung tembangba sülen UEFA Champions League atema qualify süogo.

Wolves den asayaba sülen City pur Tottenham aser Bournemouth na den asayatsü aser iba sülen Arsenal aser United den asayatsü.

Chelsea pur külem London club West Ham, Fulham aser Brentford den asayatsü aser iba sülen season tenzükter asaya pongububa nung parnok Manchester-i oa United den asayatsü.

## ICC rankings: SA nunger asayar aika jenjang junga kümogo

**Aami/June 18, 2025 (Agencies):** South Africa team-i tang mezüngbuba ICC World Test Championship akokba sülen team nung asayartem aika ICC Men's Test Player Rankings nung jenjang junga kümogo.

WTC Final nung Player of the Match Aiden Markram, Test Batting Rankings nung jenjang tenet tejakdangi tua tang 11buba nung lir, aser pai jenjang 10buba nung aliba New Zealand nunger asayar Daryl Mitchell point ana agi dang memeneipi lir. Tanabuba innings nung pai ball 207 nung run 136 yangluba ajanga South Africa-i wicket pongu agi Australia team akokba nung teyari tulu agüja liasü.

Kasa mapang nung Markram-i ball-a kanga junga aonba sülen pa All-Rounders' Rankings nunga jenjang 44 tejakdangi tuogo. Middle-order batter David Bedingham jenjang 17 tejakdangi tua tang 40buba nung lir aser Lungi Ngidi-i ball kanga junga aonba sülen pa

Bowling Rankings nung jenjang tenet tejakdangi tua 37buba tongogo.

Kagiso Rabada, shibai final asaya nung wicket teku agia liasü, pa Bowling Rankings nung maneni tanabuba jenjang nung lir. Pa India nunger asayar Jasprit Bumrah sülen tanabuba jenjang nung lir shibai point 908 ngua lir.

Australia nunger asayar Mitchell Starc, Bowling aser All-Rounders' Rankings naprongla nung top 10-i iogo. Pai WTC final nung wicket pongu agiba den tanabuba innings nung half-century ka yangluba sülen tang top 10-i iogo. Beau Webster-a batter tem rongnung jenjang 13 tejakdangi tuogo.

Kasa mapang nung India nunger asayartem rongnungi Yashasvi Jaiswal aser Rishabh Pant na maneni 4 aser 8buba nungi maestishi lir. Bowling Rankings nung Ravindra Jadeja Starc den külemi 10buba nung lir aser All-Rounders' list nung temaba jenjang nung lir.

### **BILEMDANGANG**

**"Pei shilem tuluba dangar nem agütsüba ya takum nung jangratemtsü tulutiba."**